

SAN PABLO KARTA TITO JÏI

Pablo' Tito's fxi'jni

¹ Adxa' Dxusna selpisáa Pablo yaaseth, Jesukristo jxkaahnisa. Txãasa Jesukristo tasxte nuypa'jwa'jsath Dxus txhitxnisa ũstxna txãawe'sxtxi, kxah txãawe'sxwa Dxus yuwe isasa's jiyutxna,

² bagaçxte yuhwa pçumée ĩtxi fxi'zewa'ja's ji'phuya' sũhna. Txãa pçumée ĩtxi fxi'zewa'ja's Dxusa' peesya' neeyũuk Dxus ĩsxiisamée naa kiwe meetey.

³ Txãasak txãa pçumée ĩtxi fxi'zewa'ja's en ähte', kaajiyu'j kwe'sxtxi nwe'wesa Dxusa' adxna pta'sxwa'jsa nvxihtçxa.

⁴ Naa karta's fxi'jaçthu Tito adx nçxi'k na'wēsag naa pa'ga. Txãasa e'zsay txãa na'wēçxaçxáa Dxusa's jjisatha'w. Dxus kwe'sx Tata vxite' kwe'sxtxi nwe'wesa Jesukristo txãawe'sx peeygãhçxa pu'çxte', idxa' ewçxáa wēt fxi'zene'ga.

Kreta kiwete Tito mjïini

⁵ Mar pxãhte Kreta kiwete idxa's nvxihtthu adx ma'wē neewe'weni's kxtey yuukahn. Txãa pa'gag idxa' kxtee yuwe puutx we'wena jxã'jnimée neeyũuk txãatx pheu'jna jxã'jçxa çxhab iisa dxuus yatte jxkaahwa'jsa ancianowe'sx pakweçxa ki'pna yuuwa'jsa neeyũu.

6 Anciano neeyũuwa'jsa' wala ew fxi'zesa yuutxna jxpubate yu'kxpehni yuuya'mée. Sa' peekx nyuu yakhçxáa fxi'zesa yuuwa'ja'. Aça' txãawe'sx luuçxa' Dxusa's nwēese'jsa yuuwa'ja', txã'wē Dxusa's nwēese'jmée ewmeetx yũuna fxi'ze' jĩni yuuya'mée.

7 Dxuus yatte jxkaahwa'ja's jxpa'gasa' Dxus mjĩia's thegwa'jsata', txãa pa'ga wala ew fxi'zewa'j ji'phta'. Vxitetx ũusçxa we'wena juuna' thegna fxi'zewa'jme'. Tũuna, puii jxpakwena, vxyuuçxá's yajkxçxa mjĩiwa'jme'.

8 Txã'wē yũumée, ew yũuwa'jçxá's yajkxna fxi'zewa'ja', pa'jsatx yat pki'jna, ew ũus ya-jkxçxa we'wesa, Dxus dxi'pte ew fxi'zesa, Dxus yuuçxá's selpisáa, ma'wē fxi'zewa'ja'swa peekii wala jxpa'yakxwa'ja'.

9 Dxus yuwe isasa pta'sxni yuuk txãate yuuçxáa txutemée fxi'zewa'ja', vxite jxpubasatx ewsa's kaapiya'jna kçxhãaçxha'jya', sa' Dxus yuwe isasa's açewe'wesatxwa ew kaajiyu'jya'.

10 Txã'wēme', Dxusa's açesa seena' wala ũsta', selpimeesaçxá's we'wena nasatx kaypuba'jna. Nawa judiuwe'sx wejx thaakwe txã'wē yũuna ũsta'.

11 Txãawe'sx ĩsxiini yuwe's jxukate kwe'we'jmée yuumeete', yat iisa jxuka kaypuba'jna ũsta' ewmeesaçxá's kaapiya'jna vxyuu knaywa'jçxá's yajkxçxa.

12 Txajjik teeçx wala jxtuhthesa kxteewe'sx txajx nwe'sxiiçxáatx na'jĩna we'we: Kretawe'sxa' wala ĩisxihta', weesweesata', watxkuē nũ'saçxáata' jĩnak fxi'j.

13 Txã' isa yuh we'wek. Txãa pa'ga txãawe'sxtxi' juuna' mwe'we, kxah Dxus yakh jxpubamée jweeíçxáa çxhãçxhana u'jçxa,

14 judiuwe'sx ĩsxiina kwentu'jni's nwēese'jmeetxna, sa' Dxus tasxuh txuteeçxa fxi'zesa jxkaahnitxwa nwēese'jmeetxna.

15 Maawa ũuste ewsa's ji'phsa', ew yaakxwa'j yuuçxá'sku ji'phu'. Nawa maawa ũuste ewsa's ji'phmeesa', ewmeesa yuuçxá'sku yajkxna fxi'ze', txãa pa'gatey txãawe'sx ũus yuu jxuka ewmeena naa pa'ga.

16 Dxusa's jiitha'w jĩ'tx, nawa Dxusa's ji-isa na'wē yu' fxi'ze'çmeeta', naasáa seena' kazxsaçxáata', Dxusna ahçena kíhwa ewsa yu'sa' kaavxya'ja'jya' ãjasameeta'.

2

Dxus yuwe ma'wē jxkaathe' txã'sçxáana kaapiya'jwa'ja'

1 Nawa idxa' Dxus yuwe ma'wē jxkaathe', txã'wēyçxáa kaapiya'jna mes.

2 Txã'wēme' piçthē'j thē'jsawe'sxa' kíhtewa jxuka jxpa'yakx fxi'zewa'ja's piyawa'j ji'phta', kíhsuwa kxtey yuuna, ũus yajkxçxa jxpa'yakx we'wena, Dxus yuuçxá's ũusuh jxuka yajkxna, peeygãawa'ja's peçxkanamée, makwe thēysa pa'thewa txãatxi' nxusmée fxi'zena txã'wē piyawa'j ji'phta'.

3 Txã'wēy u'y thē'jsawe'sxwa peekíi wala jxpa'yakx zhiçkwe fxi'zewa'j ji'phta'. Isameesaçxá's wēse'jçxa nuywe'wena fxi'zemée,

tũunawa fxi'zewa'jsameeta', ewsaçxá's
kaapiya'jna fxi'zewa'jsata'.

⁴ Kxah kna'sa u'se iimi'sawa txãawe'sx nmi'tx
peeygãhna fxi'zeya' piyaatxna, txã'wëy peekx
luuçtxi peeygãhna,

⁵ peekíi wala jxpa'yakx kîhtewa jxuka ewçxáa
fxi'zena, txã'wëy yattewa jxpa'yakx fxi'zena
peekx nmi'tx nwëese'jna, kxah kim yuhwa Dxus
yuwe's açewe'wemeetxna.

⁶ Txã'wëy piçtakxwe'stxxiwa myu'kxpeh ew
zhiçxkwe fxi'zekahn.

⁷ Sa' kîhtewa jxuka idxa' ew mfxi'ze, kxah
txãawe'sxwa iidx fxi'zeni's uyçxa', txã'wëy
yũukahn. Kaapiya'jni'swa le'çxkwe yuhwa
fxiyinée jxuka isasa yuuçxá's mpeeta'sx.

⁸ Ew yuuçxáa yu'kxpehna mfxi'ze, kxah
kim yuhwa i'kwe'stxxi açesa ewmée
nuywe'wewa'ja's uymeeçxa', thaameetxna.

⁹ Selpisaatxwa myu'kxpeh, txãawe'sx patron
jxkaahnitx kîhtewa jxuka nwëese'jna wa'lna
ũușçxa pasmée ewçxáa yuukahn,

¹⁰ kîh yuhnawa pesweemée ew yuuçxáa
fxi'zekahn, kxah txãawe'sx ew fxi'zeni's uyçxa',
nwe'wesa Dxus yuwe' wala zhiçxkwesa yu'ga
jĩnaçxáa we'wetxna.

¹¹ Dxusa' txajx peeygãani's kaavxya'ja'kh txã'
maatxwa jxuka ewte nvxiitwa'jsa'.

¹² Dxus peeygãani' ewmeesa's nvxihtna naa
kiwete pkalte fxi'zewa'jçxá's yaakxni'swa nvxi-
htçxa, peekíi wala jxpa'yakx fxi'zena Dxus yakh
txutemée txã's yuuçxáa selpiina fxi'zewa'ja'sku
jxkaaja'.

13 Txã'wëy Dxus peeygãani' kwe'sxtxi nwe'wesa Dxus Jesukristo jxtuhthesa kïjxa' neeyũuk txãa en ähpkaçx weçxana üythasna üswa'ja'sku jxkaaja'.

14 Txãa Jesukristo' kïh ewmeejüwa kwe'sxtxi nwe'weçxa jxuka pkaltxi yaateçxa jxukate txãa jïi vxit-ya' kwe'sx pa'gate uuk. Ewsa yuuçxá's jxuka kxtey yuu jxthãasçxak txã'wë yüu.

15 Txã'wë yüuwa'ja's kaapiya'jwa'j ji'phgu, kïh yüuwa'ja'swa üukhmée kçxhãaçxha'jna, ewmée yüukahmén yu'kxpehna. Idxa's kim yuhwa ahçena weeçxwa'j ji'phmeeta'.

3

Dxus yakh fxi'zesawe'sxa' khuëswesxtxi nwëese'jwa'j ji'phta'

1 Yakhthë'jwesxtxi ki' mkaayaki'j maawa jxkaahsawe'sxtxi nwëese'jna, khuëswesxtxiwa jxuka nwëese'jna kïhwa ew yüuwa'j yu'sa' jxuka kxtey yuukahn.

2 Kim yuhtxwa açewe'wewa'j ji'phmeeta', puii jxpakwena fxi'zewa'jsameeta' wejxwa üusuh jxuka ewçxáa yaakxwa'ja's ji'phuwa'jsata' nasa jxukaysatx peeygãhna.

3 Nyafxiaa' kwe'sxwa Dxusa's jiimeeçxa' nwëese'jsamée jxpubana naa kiwete ewmeesaçxá's pa'pçxuna puutx ewmeeçxáa yajxna puutx yahçenaçxáa fxi'zesatha'w yu', seena' kazzsa.

4 Nawa kwe'sxtxi nwe'wesa Dxus peeygãani nasa jxukaysa jïi vxyaaçxa', kwe'sxtxi nwe'wek.

⁵ Nawa kwe'sx kakweju ew yũuna fxi'zepa'ga txã'wẽ yũume', naasáa peeygãhçxa yuuçxáak txã'wẽ nwe'we kwe'sx ũuste pkaltxi yaatena. Txãa pa'gak Dxus Espiritu' kwe'sxtxi yu'pthehçxa kĩh pkal yuhwa ji'phmée kaafxi'ze'je'.

⁶ Nawa txã'wẽ nwe'wesa Jesukristopa'ga yuuçxáak Dxusa' txajx Espiritu's jxuka ũs kwe'sxtxi,

⁷ kxah Dxus dxi'pte yuuwemeesa yuuna pa'jçxa pçumée ĩtxi fxi'zewa'ja's jxpa'gakahnku txã'wẽ peeygãhçxa nwe'we.

⁸ Na'wẽ pta'sxthu txã' isa yuja', txãa pa'ga idxa' txãatxi' kaayaki'jna nes myuu, kxah Dxusa's ũuste jxpa'gasa' ewçxáa yũuna fxi'zetxna. Txã'wẽ ew yũuna fxi'zenisa' wala seelpisa' jxukaysatx.

⁹ Nawa puutx we'weni seelpimeesatxi's mpa'yajkx, txãniiteywe'sx kimçxah ne'ta yu' sa' kĩhçxah ne'ta yuusáa yu' txãaçxáatx jiyu wëna fxi'zenitx, vxite' Moises leysu we'weçxa puutx puii wëenitx, vxite' puii jxpakwena fxi'zenitx. Txã'wësa' kĩhte yuhwa seelpimeesata'.

¹⁰ I'kwe'sx pkhaakhenitewe'sx maaíia' isameesaçxá's kaapiya'jna kaypuba'jwa'jsa kasejewáana aça' txã'sa' pa'yaçxa myu'kxpeh e'z uspkaxç. Nawa e'z us we'wetewa nwëese'jmeete', pkhaakhenijũ kutxi'jçxa peena yu' kaapa'ja'jnu.

¹¹ Txã'wëme' nasa txã'wẽ yũusa' bagaçxtewa pkalte yuuçxáa fxi'zewa'jsaçxa txã'wẽ yuuna.

Tito's we'weni kĩh yũuwa'ja'swa

¹² Artemas meeçxa' Tíkiko txãawe'sxtxi iidx tasxna adx kajaçpkaçxha', idxa' dud yuweene'ga Nikopoliste adx yakh puutx uyya', nus en skhêwpkaçx kxtee ũsu'nja sũju'th.

¹³ Iidx ãjani yu'sa' kîhtewa jxuka mpu'çx yuwee pu'çxsa Zenas vxite' Apolos txãawe'sx dxi'the peejini's, kxah kîhwa peejimée dxi'the u'jwetxna.

¹⁴ Aça' iidx txã'wē yūuni's uyçxa', kwe'sx yakhthē'jwe'sxwa selpiiya' piyaatxna ew yūuna peejinisu pu'çxya'.

Pablo yuwe weçxaa kaahni

¹⁵ Adx yakh ũssa jxukaysa yuwe weçxaa kaja'tx. Aça' idxwa yuwe meen weçxa kwe'sx namikuwe'sx Dxus yakh jxpubamée fxi'zesatx. Dxusa' i'kwe'sx jxukaysatx pu'çxhina.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd